



**Tribunál Distritál Oekusi
Komunikadu Imprensa
26 Maiu 2021**

**Tribunál Distritál Oekusi adia julgamentu ba kazu “Topu Honis”
JSMP husu atu uza meu alterativu ho telekonferénsia**

Iha 24 Maiu 2021, Tribunál Distritál Oekusi (TDO) kontinua halo adiamentu ba prosesu julgamentu kazu “Topu Honis” ne’ebé ajenda ona atu rona filafali deklarasaun arguidu nian.

TDO adia prosesu julgamentu ba kazu ne’e tanba arguidu no nia advogadu sira inklui maioria lezada sira la marka prezensa iha Oekusi (iha hela Dili) tanba la hetan billete aviaun. Nune’e mós prokuradór titulár na’in rua maski desloka ona ba Oekusi maibé kumpri hela auto-karantina iha Oekusi, nu’udar kumprimentu ba protokolu saúde ba prevensaun Covid-19 durante loraun 14.

Relasiona ho adiamentu ne’e, JSMP hanoin, kumprimentu ba serka sanitária no protokolu prevensaun Covid-19 nian ne’e mós prezisa tau iha konsiderasaun hodi evita transmisaun Covid-19 bele haklekar ka habelar tan ba fatin seluk. Mezmu nune’e, JSMP hanoin katak tuir loloos adiamentu hanesan ne’e la bele akontese bebeik, tanba prosesu ne’e kleur ona no bele fó impaktu ba efikasias produsaun prova sira tuir provizaun Kódigu Prosesu Penal¹.

“Tribunál tuir loloos bele uza meu seluk hodi bele nafatin hala’o julgamentu iha situasaun serka sanitária nia laran, hanesan JSMP ninia publikasaun sira antes ne’ebé husu ba tribunál sira atu hanoin no kria mekanizmu julgamentu apropriadu seluk nu’udar opsau alternativa ba tempu naruk hanesan telekonferénsia, importante mak tenke kumpri prosedimentu sira ne’ebé iha Kódigu Prosesu Penal no Lei Protesaun Testemuña. Ida ne’e, tanba JSMP hanoin katak sei iha possibilidade atu iha tan deklarasaun Estadu Emerjénsia, serka sanitaria no mós konfinamentu obrigatória iha futuru”, dehan Diretora Ezekutiva JSMP, Sra. Ana Paula Marçal.

Julgamentu ho meu telekonferénsia ne’e, Tribunál Distritál Suai no Dili uza ona no fasilita duni tribunál sira hodi kontinua halo julgamentu ho lais no la fó impaktu ba prova sira ne’ebé antes ne’e prodús ona. Ezemplu ba kazu tentativa omisídiu simples ho Nú. Prosesu 0016/20

¹ Bele haree iha provizaun pontu 5) Artigu 250 lakon efikasias ba prova sira ne’ebé prodús ona iha Tribunál

BBBBL ne'ebé tribunál Distritál Suai prezide hodi rona deklarasaun lezadu no testemuña ne'ebé hela iha Dili no labele desloka ba Munisípiu tanba situasaun serka sanitaria no konfinamentu obrigatóriu iha Dili².

Julgamentu kazu “Topu Honis” primeiru realiza iha 23 Feveireiru 2021 no konsege rona deklarasaun arguidu nian. Depoisde rona tiha deklarasaun arguidu nian, TDO marka fali ba iha 22 Marsu 2021 ho ajenda rona deklarasaun lezada sira ne'ebé maioria husi Dili, maibé la konsege rona lezada sira nia deklarasaun tanba lezada sira la marka prezensa iha tribunál (aplikasaun serka sanitária no konfinamentu obrigatóriu iha Dili). Nune'e, iha momentu ne'ebá TDO adia tan julgamentu kazu ne'e ba iha 24 Maiu 2021 ho ajenda rona deklarasaun foun husi arguidu nian tanba deklarasaun ne'ebé antes arguidu fó lakon ona nia efikasias (Artigu 250 KPP). Maibé iha 24 Maiu 2021, TDO kontinua halo adiamentu ba prosesu kazu ne'e ho razaun sira ne'ebé temi ona iha leten. Bazeia ba observasaun JSMP nian, prokuradór na'in ida ne'ebé durante ne'e hala'o knaar iha Ministériu Públiku Oekusi nian mak substitui prokuradór titulár hodi rona de'it adiamentu ba prosesu kazu ne'e.

JSMP mós haree katak kauza husi prokuradór titulár sira la marka prezensa iha julgamentu ne'e tanba prazu ba karantina lora 14 seidak termina no defeza mós la marka prezensa tanba la hetan billete. Nune'e, JSMP hanoin, se prokuradór no defeza sira hakarak partisipa direta iha audénsia ne'e ka la halo audénsia ho telekonferénsia, tuir loloos, Prokuradór titulár no defeza sira ne'ebé iha Dili tenke halo planu ba sosa billete no kalkulasaun ba tempu kuarantena bele termina molok lora julgamentu nian hahú, nune'e sei la fó impaktu ba julgamentu ne'e. Ezemplu mak juis kolektivu ida husi Dili konsege desloka antes no kumpri auto kuarantena lora 14 antes julgamentu hahú.

JSMP hanoin katak kuandu prosesu ne'e han tempu naruk bele lori implikasaun ba iha vítima no mós arguidu nia direitu asesu ba justisa. Nune'e JSMP hanoin opsaun di'ak liu mak uza telekonferénsia.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 3323883 / 77040735

website: <http://jsmp.tl>

info@jsmp.tl

² Informasaun kompletu bele haree iha JSMP ninia publikasaun iha: <https://jsmp.tl/wp-content/uploads/JSMP-kongratula-Tribunal-sira-uza-meu-telekonferensia-hodi-halao-julgamentu-no-husu-atu-audensia-ba-leitura-desizaun-sira-halo-ih-tribunal-21-Maiu-2021.pdf>